



**URED ZA REVIZIJU INSTITUCIJA BiH
КАНЦЕЛАРИЈА ЗА РЕВИЗИЈУ ИНСТИТУЦИЈА БиХ
AUDIT OFFICE OF THE INSTITUTIONS OF BOSNIA AND HERZEGOVINA**



H.Čemerlića 2, 71000 Sarajevo, Tel: ++ 387 (0) 33 70 35 73, Fax: 70 35 65 - www.revizija.gov.ba, e-mail: saibih@bih.net.ba

**IZVJEŠTAJ O REVIZIJI
UREDA ZA RAZMATRANJE ŽALBI
ZA 2008. GODINU**

Broj : 01/03-06-16-1-502/09

Sarajevo, april 2009. godine

SADRŽAJ

I	MIŠLJENJE REVIZORA	3
II	NALAZI I PREPORUKE	5
1.	Uvod	5
2.	Postupanje po ranijim preporukama	5
3.	Sistem internih kontrola	6
4.	Planiranje i izvršenje budžeta	7
5.	Rashodi	8
5.1.	Usluge stručnog obrazovanja	8
5.2.	Ugovori za privremene i povremene poslove	9
6.	Ostalo	10
6.1.	Potencijalne obaveze	10
III	KORESPONDENCIJA	10

Prilozi :

- Tabela 1 'Odobreni i izvršeni budžet za 2008. godinu'
- Komentari klijenta na Nacrt izvještaja za 2008. godinu
- Odgovor Ureda za reviziju na komentare klijenta

I MIŠLJENJE REVIZORA

Osnova za reviziju

Izvršili smo reviziju finansijskih izvještaja **Ureda za razmatranje žalbi** (u daljem tekstu: Ured za žalbe) i usklađenosti poslovanja sa zakonima i propisima za godinu koja se završava na dan 31. decembra 2008. godine.

Odgovornost rukovodstva

Rukovodstvo Ureda za žalbe je odgovorno za pripremu i fer prezentaciju ovih finansijskih izvještaja u skladu sa prihvaćenim okvirom finansijskog izvještavanja tj. Pravilnikom o finansijskom izvještavanju institucija BiH („Službeni glasnik BiH“ broj 33/07) i Pravilnikom o računovodstvu budžeta institucija BiH. Ova odgovornost obuhvata: osmišljavanje, primjenu i održavanje internih kontrola koje su relevantne za pripremu i fer prezentaciju finansijskih izvještaja koji ne sadrže materijalno značajne pogrešne iskaze, odabir i primjenu odgovarajućih računovodstvenih politika i računovodstvene procjene koje su razumne u datim okolnostima. Rukovodstvo je takođe odgovorno za usklađenost poslovanja Ureda za žalbe sa važećim zakonskim i drugim relevantnim propisima.

Odgovornost revizora

Naša je odgovornost da izrazimo mišljenje o finansijskim izvještajima na osnovu revizije. Reviziju smo izvršili u skladu sa Zakonom o reviziji institucija Bosne i Hercegovine („Službeni glasnik BiH“ broj 12/06), INTOSAI revizijskim standardima („Službeni glasnik BiH“ broj 5/01) i Međunarodnim standardima revizije (ISA). Ovi standardi nalažu da radimo u skladu sa etičkim zahtjevima i da reviziju planiramo i izvršimo na način koji omogućava da se, u razumnoj mjeri, uvjerimo da finansijski izvještaji ne sadrže materijalno značajne pogrešne iskaze, te da je poslovanje usklađeno sa važećim zakonskim i drugim relevantnim propisima.

Revizija uključuje provođenje postupaka u cilju pribavljanja revizionih dokaza o usklađenosti poslovanja i o iznosima i objelodanjivanjima datim u finansijskim izvještajima. Izbor postupka je zasnovan na revizorskom prosuđivanju, uključujući procjenu rizika materijalno značajnih pogrešnih iskaza u finansijskim izvještajima. Prilikom procjene rizika, revizor razmatra interne kontrole koje su relevantne za pripremu i fer prezentaciju finansijskih izvještaja, u cilju osmišljavanja revizionih postupaka koji su odgovarajući u datim okolnostima, ali ne u cilju izražavanja odvojenog mišljenja o efektivnosti internih kontrola. Revizija takođe uključuje ocjenu primijenjenih računovodstvenih politika i značajnih procjena izvršenih od strane rukovodstva, kao i ocjenu opšte prezentacije finansijskih izvještaja.

Smatramo da su pribavljeni revizionih dokazi dovoljni i odgovarajući i da osiguravaju osnovu za mišljenje revizora.

Kvalifikacija

1. Kao što je navedeno pod tačkom 5. izvještaja izdaci po osnovu stručnog obrazovanja (postdiplomskog studija iz ranijeg perioda), te izdaci po osnovu ugovora o privremenim i povremenim poslovima nisu izvršeni u skladu sa relevantnim propisima.

Mišljenje

Prema našem mišljenju, finansijski izvještaji Ureda za žalbe prikazuju istinito i objektivno, po svim bitnim pitanjima, stanje imovine i obaveza na dan 31. decembra 2008. godine, rezultate poslovanja i izvršenje budžeta za godinu koja se završava na taj dan, u skladu sa prihvaćenim okvirom finansijskog izvještavanja.

Finansijsko poslovanje Ureda za žalbe u toku 2008. godine bilo je u svim materijalno značajnim aspektima usklađeno sa važećom zakonskom regulativom, osim za napomenu navedenu pod tačkom 1.

Bez daljeg kvalifikovanja našeg mišljenja skrećemo pažnju na tačku 6. izvještaja, u kojoj je navedeno da je Ured za žalbe tuženik u sudskim procesima koji su u toku. Konačan ishod po ovom pitanju se, za sada, ne može utvrditi, ali potencijalne obaveze po sudskim sporovima mogu eventualno imati svoj odraz u finansijskim izvještajima.

Sarajevo, 20.04.2009. godine

Zamjenik generalnog revizora

Dževad Nekić

Generalni revizor

Milenko Šego

II NALAZI I PREPORUKE

1. Uvod

Ured za žalbe je samostalna, uspravna organizacija sa statusom pravnog lica.

Uloga Ureda za žalbe je da kao drugostepeni organ osigura pravilno provođenje odredbi Zakona o javnim nabavkama Bosne i Hercegovine. Ovlaštenja Ureda za žalbe i postupak po žalbama definisani su odredbama člana 52. Zakona o javnim nabavkama Bosne i Hercegovine¹.

Ured za žalbe sastoji se od tri člana, koji se biraju iz reda priznatih stručnjaka upravnog prava i/ili upravnog postupka i tri člana, koji su stručnjaci u oblasti izvođenja radova, javnih nabavki, transporta i strateškog poslovnog upravljanja, a izabrani su putem javnog konkursa na način predviđen podzakonskim aktima. Članove Ureda za žalbe na prijedlog Vijeće ministara Bosne i Hercegovine imenuje Parlamentarna skupština Bosne i Hercegovine.

Ured za žalbe dostavlja godišnje izvještaje Parlamentarnoj skupštini Bosne i Hercegovine.

Predsjedavajući Ureda za žalbe donosi Pravilnik o unutrašnjoj organizaciji ureda.

2. Postupanje po ranijim preporukama

Ured za reviziju institucija BiH izvršio je reviziju poslovanja Ureda za žalbe za 2007. godinu o čemu je sačinjen Izvještaj o reviziji. Revizijom su konstatovane slabosti u funkcionisanju sistema internih kontrola, te u procesima planiranja i izvršenja budžeta. Rukovodstvu Ureda za žalbe je sugerisano da razmotri utvrđene slabosti i preduzme aktivnosti u cilju njihovog otklanjanja.

Ured za žalbe je u skladu sa odredbama člana 16. stav 3. Zakona o reviziji institucija Bosne i Hercegovine dostavio Odgovor u vezi Izvještaja o reviziji Ureda za razmatranje žalbi za 2007. godinu.

Osvrtom na preporuke revizije date u Izvještaju o reviziji za 2007. godinu, te uvidom u preduzete aktivnosti utvrdili smo sljedeće:

Preporuke koje su u toku:

- Pokrenuta je procedura za imenovanje dva člana ureda.
- Pokrenuta je procedura za usvajanje Pravilnika o unutrašnjoj organizaciji Ureda za žalbe.
- Pokrenuta je procedura za rješavanje pitanja naknada za rad po osnovu angažovanja uposlenih na rješavanju žalbi zaprimljenih do septembra 2006. godine.

¹ Zakon o javnim nabavkama Bosne i Hercegovine („Službeni glasnik BiH“, broj: 49/09, 19/05, 52/05, 92/05, 24/06, 70/06, 12/09)

Nerealizovane preporuke:

- Nije izvršena raspodjela ovlaštenja i odgovornosti između predsjedavajućeg i tri člana Ureda za žalbe vezano za izvršenje obaveza iz budžeta.
- Proces planiranja budžeta i dalje nije efikasan.

3. Sistem internih kontrola²

U postupku revizije na uvid je prezentiran Prijedlog pravilnika o unutrašnjoj organizaciji Ureda za razmatranje žalbi, prema kome je za obavljanje poslova iz nadležnosti Ureda za žalbe predviđeno 17 izvršilaca i to: 6 imenovanih lica, 7 državnih službenika i 4 zaposlenika.

Odredbom člana 49. stav (5) Zakona o javnim nabavkama Bosne i Hercegovine propisano je da se Ured za žalbe sastoji od šest članova (tri člana, koji se biraju iz reda priznatih stručnjaka upravnog prava i/ili upravnog postupka i tri člana, koji su stručnjaci u oblasti izvođenja radova, javnih nabavki, transporta i strateškog poslovnog upravljanja). Tokom 2008. godine bila su uposlena četiri člana Ureda za žalbe. Napominjemo da su dva člana iz reda stručnjaka upravnog prava imenovana u 2009. godine. Provedenom revizijom je utvrđeno da nije uspostavljena odgovarajuća raspodjela odgovornosti i ovlaštenja između predsjedavajućeg Ureda za žalbe i ostalih članova prilikom odlučivanja o izvršavanju obaveza iz budžeta.

Ured za žalbe, tokom 2008. godine, nije uspostavio organizacionu strukturu s obzirom da Prijedlog pravilnika o unutrašnjoj organizaciji sa utvrđenom sistematizacijom radnih mjesta nije dobio potrebnu saglasnost Vijeća ministara BiH. Za obavljanje poslova predviđenih za državne službenike, tokom 2008. godine, bilo je angažovano 5 lica (4 stručna savjetnika za pitanja javnih nabavki i 1 stručni savjetnik za finansijsko-računovodstvene poslove) temeljem ugovora o obavljanju privremenih i povremenih poslova.

Naime, prema navodima u izvještaju o radu Ureda za žalbe, Prijedlog pravilnika je u proceduri usvajanja od 2006. godine, uz napomenu da je Vijeće ministara na 11. sjednici održanoj 24.05.2007. godine, dalo saglasnost na podneseni Prijedlog pravilnika s tim da se u tekst istog ugrade primjedbe date u Mišljenju ministarstva pravde.

Ne ulazeći u formalno-pravne razloge neusvajanja sistematizacije radnih mjesta, niti u neophodnosti angažovanja izvršilaca za obavljanje poslova i zadataka iz nadležnosti Ureda za žalbe, ističemo činjenicu da naprijed navedeno može za posljedicu imati nepostojanje odgovarajuće raspodjele ovlaštenja i odgovornosti, te uticati na zakonitost postupanja u pojedinim značajnim procesima.

Preporuka: Potrebno je preduzeti aktivnosti za uspostavljanje adekvatne organizacione strukture u cilju povećanja efikasnosti sistema internih kontrola.

² Interna kontrola je skup postupaka koje oblikuje uprava, rukovodioci i ostali zaposleni sa svrhom sticanja razumnog uvjerenja u pogledu postizanja ciljeva na području sljedećih kategorija: uspješnost poslovanja, pouzdanost finansijskog izvještavanja i usklađenost sa primjenljivim zakonima i propisima.

4. Planiranje i izvršenje budžeta

Zakonom o budžetu institucija Bosne i Hercegovine i međunarodnih obaveza Bosne i Hercegovine za 2008. godinu odobrena su budžetska sredstva Uredu za žalbe u iznosu od 1.071.347 KM.

Ukupno izvršenje budžeta Ureda za žalbe iznosilo je 733.694 KM što, u odnosu na ukupno raspoloživa sredstva u iznosu od 1.071.347 KM, predstavlja izvršenje od 68%. Izvršenje budžeta po vrsti rashoda prikazano je u tabeli 1 - Odobreni i izvršeni budžet za 2008. godinu u prilogu Izvještaja.

Ispitujući efikasnost sistema internih kontrola u procesima planiranja i raspolaganja javnim sredstvima uočene su određene slabosti koje nisu značajnije uticale na istinitost i vjerodostojnost finansijskih izvještaja i pravilnost poslovanja u 2008. godini, ali koje mogu imati uticaja na poslovanje u budućem periodu. S tim u vezi utvrdili smo sljedeće:

- Planiranje budžetskih sredstava nije vršeno u skladu sa realno procijenjenim potrebama što je za posljedicu imalo:
U decembru 2008. godine, na temelju odluke Ministarstva finansija i trezora, izvršeno je prestrukturiranje rashoda u iznosu od 55.000 KM, na način da je povećana pozicija troškova zakupa za 30.000 KM i ugovorenih i drugih posebnih usluga za 25.000 KM, a smanjena pozicija naknada troškova uposlenih za 55.000 KM.
Analizom planiranog budžeta i njegovog izvršenja utvrđeno je da se neutrošena sredstva u iznosu od 337.653 KM najvećim dijelom odnose na sredstva za plaće i naknade uposlenih, a posljedica su projekcije budžeta za 17 izvršioca, dok je na kraju budžetske godine bilo uposlono 8 izvršilaca.

Preporuka: Uspostaviti odgovarajući proces planiranja na temelju realno procijenjenih potreba u cilju efikasnog i racionalnog korištenja budžetskih sredstava.

- Provedenom revizijom je utvrđeno da je na osnovu interne Odluke Ureda za žalbe izvršena nabavka poklon setova u iznosu od 1.100 KM (22 poklon seta po 50 KM) u povodu 8. marta Dana žena. Uvidom u raspoloživu dokumentaciju utvrđeno je da je 11 poklon setova uručeno zaposlenicama Ureda za žalbe, a da je 11 setova preuzeto od strane članova Ureda za žalbe u svrhu podjele istih poslovnim suradnicama iz drugih institucija.

Mišljenja smo da institucije ne mogu svojim internim aktima utvrditi pravo na isplatu naknada koje nisu taksativno navedene u važećim propisima kojima su uređena prava na naknade zaposlenim, odnosno da takvo pravo može biti utvrđeno samo na osnovu odgovarajućih akata Parlamentarne skupštine BiH ili Vijeća ministara BiH jednoobrazno za sve korisnike koji se finansiraju iz budžeta institucija BiH.

Preporuka: Preispitati odredbe internih akata na osnovu kojih je utvrđeno pravo na isplatu određenih naknada zaposlenicama, te uspostaviti odgovarajući sistem internih kontrola koji će osigurati da trošenje budžetskih sredstava bude u funkciji ostvarenja ciljeva koji su definisani osnovnim zakonom i zbog kojih je institucija i osnovana.

5. Rashodi

5.1. Usluge stručnog obrazovanja

Revizijom troškova stručnog obrazovanja utvrđeno je da je na analitičkoj poziciji - Usluge stručnog obrazovanja iskazan iznos od 4.845 KM, te na analitičkoj poziciji - Izdaci za specijalizaciju i školovanje iznos od 3.291 KM. Prema priloženoj dokumentaciji u okviru navedenih iznosa izvršene su isplate za stručno usavršavanje članova Ureda i to:

1. Iznos od 4.200 KM koji se odnosi na troškove školarine na Postdiplomskom studiju na Pravnom fakultetu Univerziteta u Sarajevu, za člana Ureda iz reda stručnjaka u oblasti izvođenja radova, javnih nabavki, transporta i strateškog poslovnog upravljanja. Odredbama Odluke o raspisivanju konkursa i utvrđivanju uslova za članove Ureda za razmatranje žalbi definisano je da kandidati za izbor i imenovanje članova Ureda koji su stručnjaci u oblasti javnih nabavki, transporta i strateškog poslovnog upravljanja treba da imaju visoku stručnu spremu pravnog ili ekonomskog smjera.

2. Iznos od 3.000 KM koji se odnosi na refundaciju troškova ocjene i odbrane doktorske disertacije na Pravnom fakultetu Univerziteta u Sarajevu, za člana Ureda iz reda priznatih stručnjaka upravnog prava i/ili upravnog postupka. Uvidom u raspoloživu dokumentaciju na osnovu koje je izvršena isplata za navedeni izdatak utvrđeno je uz zahtjev za isplatu priložena original uplatnice od 25.02.2000. g. na iznos od 600 KM i ovjeren prijem uplatnice od 07.11.2002. g. na iznos od 2.400 KM. Napominjemo da je odredbama Odluke o raspisivanju konkursa i utvrđivanju uslova za članove Ureda za razmatranje žalbi definisano da kandidati za Članove Ureda iz reda priznatih stručnjaka upravnog prava i/ili upravnog postupka treba da imaju visoku stručnu spremu pravnog smjera i položen pravosudni ispit ili da su univerzitetski profesori ili imaju zvanje docenta u oblasti upravnog prava ili upravnog postupka, te da je član korisnik prava na refundaciju troškova obrazovanja imenovan u decembru 2005.godine.

Internim aktima Ureda definisano je da su korisnici sredstava za naknadu troškova školovanja dužni ostati na radu u Uredu u periodu koji je određen važećim propisima.

Naime, osnovni cilj ovih izdataka treba biti stručna edukacija i usavršavanje u funkciji usvojene sistematizacije radnih mjesta (putem kurseva, seminara, itd.), a u vezi sa činjenicom da se na osnovu pravilnika o unutrašnjoj organizaciji i sistematizaciji radnih mjesta institucije, kojim su definisani uslovi u pogledu stručne spreme za rad na određenim poslovima, raspisuje konkurs i vrši izbor uposlenika. Osim toga, zaključivanje ugovora kojim se zaposleni obavezuju da u instituciji provedu određeni vremenski period je nesvrshodno za isplate naknada školovanja licima koja su imenovana i koja će u instituciji provesti vremenski period određen propisima po kojima su imenovani.

Preporuka: Polazeći od činjenice da su zaposleni u institucijama BiH, prije samog zaposlenja, imali potrebnu kvalifikaciju i stručnu spremu za obavljanje poslova na radnim mjestima, na koja su putem javnog konkursa zaposleni, smatramo da ne postoji potreba za njihovim dodatnim doškolovanjem na teret budžeta, te da treba razlikovati sticanje zvanja od redovnih edukacija u struci nakon stečenog zvanja. Preispitati odredbe internih akata kojima je utvrđeno pravo na naknadu troškova za obrazovanje i stručno usavršavanje zaposlenim, a za dio koji se odnosi na retroaktivno priznate troškove postdiplomskog studija iz 2000./2002.g. izvršiti povrat sredstava na jedinstven račun trezora.

5.2. Ugovori za privremene i povremene poslove

Revizijom izdataka po osnovu ugovora za privremene i povremene poslove utvrđeno je da je na temelju istih, za obavljanje poslova iz nadležnosti Ureda za žalbe, vršeno angažovanje izvršilaca, a kao posljedica neusvajanja Pravilnika o unutrašnjoj organizaciji sa utvrđenom sistematizacijom radnih mjesta kako je navedeno u tački 3. izvještaja.

Izdatak po osnovu ugovora za privremene i povremene poslove iskazan je u neto iznosu od 85.196 KM (12% ukupnog izvršenja budžeta). Strukturu navedenog izdatka čine: izdatak za stručne savjetnike za pitanja javnih nabavki i stručnog savjetnika za finansijsko-računovodstvene poslove u iznosu od 43.346 KM; izdatak za pripravnika-pravnika u iznosu od 7.200 KM; izdatak za administrativno-tehničke poslove, čišćenje prostorija, kurirske poslove, poslove vozača i portira u iznosu od 16.150 KM i izdatak za angažovanje lica za pripremu žalbi u iznosu od 18.500 KM.

U toku revizije nismo se mogli uvjeriti da postoje jasni kriteriji za odabir i angažman izvršitelja, te način utvrđivanja visine naknade za poslove iz ugovora o privremenim i povremenim poslovima.

U ukupno isplaćenom iznosu po osnovu Ugovora o privremenim i povremenim poslovima, revizijom je obuhvaćen iznos od 18.500 KM koji je isplaćen jednom izvršitelju za posao „pripremanja žalbi koje su zaprimljene u Uredu za razmatranje žalbi do 19.09.2006. godine za rješavanje“. Pomenuti izvršitelj je angažovan na temelju Ugovora potpisanog za januar 2008. godine, uz ugovorenu naknadu za rad u iznosu od 2.000 KM, te Ugovora za period februar-decembar 2008. godine, sa ugovorenim iznosom mjesečne naknade od 1.500 KM.

Osim navedenog napominjemo da je dugoročni angažman izvršilaca, na temelju ugovora o privremenim i povremenim poslovima, na radnim mjestima zaposlenika, bio osnova za zasnivanje radnog odnosa prema odredbama Zakona o radu u institucijama Bosne i Hercegovine.

Preporuka: Preispitati isplate po osnovu ugovora o djelu u cilju efikasnosti poslovanja, te usklađenosti poslovanja sa relevantnim propisima.

6. Ostalo

6.1. Potencijalne obaveze

Analizom izdatka iskazanog na analitičkoj poziciji-Troškovi spora u iznosu od 1.050 KM utvrđeno je da je isti evidentiran na osnovu dvije odluke Suda BiH, na ime troškova postupka za angažovanje advokata od strane podnosioca tužbe. Naime, u Izvještaju sačinjenom prema tački II Uputstva o načinu iskazivanja podataka u godišnjem izvještaju u organima uprave BiH o rješavanju upravnih stvari u upravnom postupku, Ured je iskazao sljedeće podatke:

U periodu 01.01.-31.12.2008. godine, ukupno je zaprimljeno 1.145 žalbi, od čega je riješeno 1.078, a neriješeno 67 predmeta. Prema napomeni navedenoj u izvještaju tokom 2008. godine riješene su i 72 žalbe zaprimljene u 2007. godini, te 363 žalbe zaprimljene u periodu 01.04.-19.09.2006. godine.

U toku 2008. godine pokrenuta su ukupno 103 upravna spora, od čega je Sud BiH donio odluke u 19 predmeta. U tri predmeta Sud BiH je poništio odluke Ureda kao drugostepenog organa i odluke ugovornog organa kao prvostepenog organa, a u četiri predmeta Sud BiH je poništio odluke Ureda kao drugostepenog organa.

Ured je prilikom projekcije budžeta za 2008. godinu izvršio procjenu obaveza, koje mogu nastati po sudskim sporovima, u iznosu od 30.000 KM.

III KORESPONDENCIJA

Uredu za žalbe je uručen Nacrt Izvještaja o reviziji za 2008. godinu na razmatranje i dostavljanje eventualnih novih dokaza i komentara na nalaze revizije.

U ostavljenom roku od 15 dana, Ured za žalbe je dostavilo komentare na nalaze sadržane u Nacrtu izvještaja o reviziji.

Po našoj procjeni, Ured za žalbe nije dostavio nove dokaze i činjenice koje bi uticale na izmjenu nalaza sadržanih u Nacrtu izvještaja o reviziji. Po tom osnovu ovaj Izvještaj predstavlja konačan izvještaj dostavljen klijentu bez korekcija u odnosu na Nacrt izvještaja o reviziji.

U prilogu Izvještaja dostavljamo vam komentare Ureda za žalbe i naš odgovor na komentare.

Revizioni tim:

Mirsada Sijamić, viši revizor

Nada Laco, revizor



URED ZA RAZMATRANJE ŽALBI

Odobreni i izvršeni budžet za 2008. godinu

Tabela 1

Red. broj	Vrsta rashoda	Odobreni budžet	Promjena strukture budžeta	Ostala povećanja budžeta *	Ukupno budžet (3+4+5)	Izvršenje budžeta	Razlika (6-7)	Procenat (7/6)
1	2	3	4	5	6	7	8	9
I	Tekući izdaci	986.347	0	0	986.347	652.925	333.422	66
1.	Plaće zaposlenih	443.467	0	0	443.467	273.636	169.831	62
2.	Naknade troškova zaposlenih	140.312	-55.000	0	85.312	46.741	38.571	55
3.	Putni troškovi	58.423	0	0	58.423	19.581	38.842	34
4.	Izdaci telefonskih i pošt.usluga	50.146	0	0	50.146	36.289	13.857	72
5.	Izdaci za energiju i kom. Usluge	29.211	0	0	29.211	16.114	13.097	55
6.	Nabavka materijala	19.474	0	0	19.474	11.910	7.564	61
7.	Izdaci za usl. prijevoza i goriva	14.606	0	0	14.606	5.104	9.502	35
8.	Unajmljivanje imovine i opreme	81.792	30.000	0	111.792	87.422	24.370	78
9.	Izdaci za tekuće održavanje	14.606	0	0	14.606	6.327	8.279	43
10.	Izdaci za osiguranje	4.868	0	0	4.868	2.387	2.481	49
11.	Ugovorene usluge i druge usluge	129.442	25.000	0	154.442	147.414	7.028	95
II	Kapitalni izdaci	85.000	0	0	85.000	80.769	4.231	95
1.	Nabavka zemljišta	0	0	0	0	0	0	0
2.	Nabavka građevina	0	0	0	0	0	0	0
3.	Nabavka opreme	85.000	0	0	85.000	80.769	4.231	95
4.	Nabavka ostalih stalnih sreds.	0	0	0	0	0	0	0
5.	Rekonstrukcija i inves.održ.	0	0	0	0	0	0	0
III	Tekući grantovi	0	0	0	0	0	0	0
1.		0	0	0	0	0	0	0
2.		0	0	0	0	0	0	0
3.		0	0	0	0	0		0
IV	Ukupan budžet	1.071.347	0	0	1.071.347	733.694	337.653	68
	Broj zaposlenih	17			17	9	8	53